

Aso – da interessiert mi ken alte Huet, säg i denn, wenn mer öppis wörklech gliich isch. Di Junge säget denn ener: da isch mer scheissegal oder: s'goht mer chüel am Arsch verbii. I mag mi nöd ufrege ab dere grobe Sproch. Mengmol g'hör i mi selber au scho fascht so schwätze. Efach wil i mi schnell a so Uusdröck gwöhne ond wil i wääss, dass si au schnell wider änderet.

Do isch mini Grosmueter ganz andersch gse. Si isch e schtrengi Frau gse und het wenig Humor gha. Si het gnau gwösst, wie me aaschtändig schwätzt. Mer hend möse Grüezi ond Adie säge ond nöd Hoi ond Tschau, drof het si fescht Wert gläät. Klar hemmer als Goofe öppe n au uusprobiert öb's ere nöd emol veläadet. I cha mi aber a ke n enzigs Mol erinnere.

Natürlech het si au reklamiert, wenn mer „verrockt schöö“ oder „wahnsinig guet“ gsäät hend. Geduldig het si üüs immer wider erklärt, wa die beide Wörter „verrockt“ ond „wahnsinnig“ eigentlech hässet ond wa si för die chranke Mensche ond erni Omgebige bedüütet. Gnötzt het's überhopt nünt. I tenk no öppe a mini Grosmueter ond frog mi, wa si echt hüt wör säge, wenn üsi Chend, also erni Urenkel allpott säget: uuh huere geil oder mega cool.